




ԲԱԳՐԱՏ ՈՒԼՈՒԲԱԲՅԱՆ

ՀԱՅՈՑ ԵԿԵՂԵՑՈՒ ԱՂՎԱՆԻՑ ԹԵՎԻ ՍԿԶԲՆԱՎՈՐՄԱՆ ՀԱՐՑԸ

Հայոց եկեղեցու պատմության վաղագույն շրջանից մեզ են հասել աղբյուրագիտական սակավ նյութեր ու շատ ավանդություններ: Եվ եթե այսօր այդ շրջանի մասին կան գիտական հստակ պատկերացումներ, ապա շնորհիվ մեր հետազոտողների քրտնաջան պրպտումների, որոնք աղբյուրագիտական սող նյութերից ու ավանդություններից հյուսել են ժամանակի արժանահավատ պատկերը: Սակայն, այսուհանդերձ, դեռևս կան հարցեր, որոնք դուրս են մնացել քրնություն ունի, և նույնիսկ գիտական շրջանակներում նրանց մասին այսօր էլ տիրապետող է ո՛չ գիտական, մշտնջող պատկերացումը: Այդօրինակ հարցերից է հայոց եկեղեցու Աղվանից թևի կազմավորումը:

Աղվանից կաթողիկոսության նվիրապետական ազդեցությունը տարածված է եղել բուն Աղվանքի և Ուտիք ու Արցախ նահանգների վրա: Բուն Աղվանքն ընդգրկում էր Կուրից մինչև Կովկասյան լեռնաշղթան և Ալազան գետից մինչև Կասպից ծովն ընկած երկրամասը: Իսկ Ուտիքն ու Արցախը հին Հայաստանի երկու նահանգներն էին, որոնք բռնում էին Կուրից մինչև Երասխը և այդ գետերի միախառնվելու վայրից մինչև Հնարակերտ ավանը (այժմյան Խրամի գետաբերանում): 428 թ. պարսկական բռնապետությունը վերացրեց Արշակունյաց թագավորական հարստությունը Հայաստա-

նում և դարձյալ Արշակունյաց տոհմին պատկանող Մազքթաց թագավորությունը բուն Աղվանքում: Դրանից հետո էր ադեն, որ Ուտիք ու Արցախ նահանգներից և բուն Աղվանքից կազմվեց պարսկահպատակ մեկ մարզպանություն¹: Այս մարզպանության տարածքը հետագայում վարչա-քաղաքական բազմաթիվ վերաձևումների ու փոփոխությունների է ենթարկվել: Սակայն բոլոր պարագաներում հիշյալ տարածքի քրիստոնյա ամբողջ բնակչությունը մնացել է մեկ հոգևոր նվիրապետության՝ Աղվանից կաթողիկոսության իշխանության ներքո, իսկ այս կաթողիկոսությունն էլ միշտ ենթակա է եղել Ամենայն Հայոց Հայրապետությանը:

Եթե մարզպանական և ետմարզպանական շրջանների քաղաքական ու եկեղեցական կյանքի դարձդարձումները հնարավոր է առնել պատմագիտական մի հյուսվածքի մեջ, քանի որ այդ շրջանների մասին խոսում են հայրենի արժանահավատ աղբյուրները, ապա նույնը չի կարելի ասել նախորդ շրջանի մասին՝ անմիջական աղբյուրների բացակայության պատճառով: Բավական է

¹ Այս առթիվ հանգամանորեն տե՛ս Բ. Ուլուքաբյան, Հյուսիս-արևելյան Հայաստանի նախամարզպանական շրջանի վարչա-տնտեսական վիճակի հարցի շուրջը. «Բանբեր Երևանի համալսարանի», 1975, № 2, էջ 149—164:

ասել, որ Աղվանից կաթողիկոսության շրջանակներում ընդգրկված տարածքի բնակչության քրիստոնեության դարձի հանգամանքների համար հետազոտողները միակուսարժանահավատ աղբյուր են ընդունում «Աղվանից աշխարհի պատմություն»-ը, որը վերջնական խմբագրման է ենթարկվել Ժ դարում: Այս «Պատմության» տվյալներն են, որ շարադրվել են, ընդունվել կամ չեն ընդունվել մասնագիտական հետազոտություններում, հայոց եկեղեցու բազմադարյան պատմությանը նվիրված հին ու նոր երկերում:

Իսկ այդ տվյալները հետևյալներն են.

Հատ ավանդության՝ Թադեոս առաքյալի Հայաստան քարոզության գալուց և այնտեղ նահատակվելուց հետո, նրա աշակերտներից մեկը՝ Եղիշե անունով, վերադառնում է Երուսաղեմ, այնտեղ, իբր «ի ձեռաց սրբոյն Յակոբայ, եղբոր Տեառն», ձեռնադրվում եպիսկոպոս՝ «վիճակ առեալ իւր զԱրևելս», ապա «նահապարհ արարեալ յԵրուսաղեմէ ընդ Պարսս, մտանէ ի Մազքութս, խոյս տուեալ ի Հայաստանեայց, և սկիզբն առնէ քարոզութեան ի Չողայ... Անտի եկեալ յՈստի գաւառ...» քարոզում է, հետո «եկեալ ի Գիս, կանգնեաց զեկեղեցի և մատուց զանարիսն պատարագ: Եւ անտի անցեալ ընդ դաշտակն Չերգունի ի տեղի զոհարանի դիցամոլ կոսպաշտիցն՝ անդ էառ զնահատակութեան պսակն»:

Քարոզիչ-նահատակի մարմինը թաղվել է Հոմենք կոչվող վայրում²:

Այս բոլորը կատարվել է մեր թվականության առաջին դարում:

Այլուստ հայտնի չեն Գիս, Չերգուն, Հոմենք տեղանունները: Սակայն հենց նույն աղբյուրի վկայությամբ՝ գտնվում էին Ոստիք նահանգում³: Նկատի առնելով նաև նույն սկզբնաղբյուրի լրացուցիչ տեղեկությունն այն մասին, որ Եղիշեի նշխարները հետագայում գտնվել և անմիջապես էլ տեղավորվել են մոտակա Հուրեկ և Ներսմիրհի (հետագայի՝ Զրվշտիկ) վանքերում, իսկ սրանք գտնվում են ժամանակակից Մարտակերտի շրջանի հյուսիս-արևելյան մասում (Հուրե-

կը կամ Հոռեկա վանքը՝ Թալիշ գյուղի թիկունքում⁴, իսկ Զրվշտիկը, որ հենց այդ նշխարների պատճառով կոչվում է նաև Եղիշե առաքյալի վանք՝ Թարթառի ձորում⁵), կարելի է համոզված ասել, որ հիշյալ տեղանունները վերաբերել են Թարթառի ձախափնյակին, մոտավորապես այժմյան Բարդաշի շրջանի արևմտյան մասին և Միր-Բաշիրի շրջանին:

Ուրեմն, Հայաստան աշխարհի առաջին քարոզիչ Թադեոս առաքյալի աշակերտ Եղիշեն քրիստոնեություն է քարոզել բուն Աղվանքում և Ոստիքում ու նահատակվել Թարթառի ձախ ափին:

Այս տվյալները հաղորդում է միայն «Աղվանից աշխարհի պատմությունը», և նրան էլ կրկնում են մեր միջնադարյան հեղինակները: Այլ խոսքով՝ նշված տվյալներն ստուգել անհնար է, քանի որ դրանք ժխտող կամ առավել արժանահավատ տեղեկություններ հաղորդող աղբյուրներ չկան:

Անշուշտ չի կարելի սուկ մի քարոզության ու նահատակության հիման վրա պնդել, թե սա արդեն երկրամասի քրիստոնեացման սկիզբն է եղել: Մանավանդ, երբ հայտնի է, որ բնակչությունը միանգամայն անհաղորդ է մնացել այս ամենին, և նույնիսկ Եղիշեի երեք աշակերտներից երկուսը վերստին հետևել են հեթանոսության⁶:

Հետաքրքիր է, որ Եղիշե քարոզչի մասին զրույցը երկրամասի եկեղեցական ամբողջ կյանքում միշտ էլ փորձաքարի նշանակություն է ունեցել: Աղվանից մարզպանության եկեղեցու հայրերը, իրենց առաջին քարոզչին ներկայացնելով իբրև Հայաստանի առաջին քարոզիչ Թադեոս առաքյալի աշակերտի և նրա գործը շարունակողի, ամեն կերպ ջանում էին իրենց կաթողիկոսությունը պահել Ամենայն Հայոց նվիրապետության ոլորտում: Բավական էր, սակայն, հերձվածողական մի փոքր խլրտում կամ կենտրոնախույս տրամադրությունների բոր-

⁴ Գլխավանք է կոչվում, քանի որ, ըստ ավանդության, այնտեղ է պահվել Եղիշե առաքյալի մասունք-գլուխը (**Կաղանկատուացի**, էջ 18):

⁵ Վանքը գտնվում է Թարթառի մի ոլորանում բարձրացած ժայռի վրա: Մակար Բարխուտարյանը բավանական էր համարում, որ վանքն իր Զրվշտիկ անունն ստացած լինի գետի զմայելի ջրվեժի ձայնից (**Մակար վարդապետ Բարխուտարյանը**, Արցախ, Բագու, 1895, էջ 234, ծան. 1):

⁶ **Կաղանկատուացի**, էջ 17: Ոստիքում Եղիշեին ու նրա երեք աշակերտներին հետապնդում են «անօրենք ոմանք»: «...Մի յաշակերտացն ընկալաւ ի նոցանէ զնահատակութեան վախճան, և երկուցն, թողեալ զերանելին Եղիշայ, գնացին զկնի խողխողիչ արանցն»:

² **Մովսէս Կաղանկատուացի**, Պատմութիւն Աղուանից աշխարհի, Թիֆլիս, 1912, էջ 16—17:

³ Հետազոտողները բազմիցս Գիս ավանը շփոթել են բուն Աղվանքի Քիշ անունով գյուղի հետ, որը գտնվում է Ծաքի-Նուխիից հյուսիս: Ծփոթել են նույնիսկ Լեոնային Դարաբաղի Մարտունու շրջանի Գիշիի հետ, որը համեմատաբար նորաստեղծ գյուղ է: Այս թյուրիմացությունների մասին հանգամանորեն տե՛ս **Բ. Ուլուբաբյան**, Պատմա-աշխարհագրական ճշգրտումներ. «ԲԵՀ», 1971, № 1, էջ 176—177:

բոքում, որպեսզի նույն այդ Եղիշե քարոզիչը դառնար դրոշակ՝ Աղվանից կաթողիկոսությունը նախագահ հայտարարելու և Աղվանքի եկեղեցին առավել հին ու ինքնուրույն հորջորջելու համար:

Այս առումով ուշագրավ է նաև մի այլ հանգամանք: Աղվանքի հոգևոր ու աշխարհիկ ղեկավարները միշտ որոնել-գտել են մայր հայրենիքին ու նրա հավատին առավել սերտորեն կապվելու նոր հանգույցներ ու միջոցներ: Վաչագան Բարեպաշտի օրերում այդպիսի դեր ունեին Եղիշեի, Գրիգոր Լուսավորչի թոռ և Գրիգորիսի մասունքների գյուտը և նրանց շուրջ ստեղծված համաժողովրդական ոգևորությունն ու ոգեշունչ ծիսակատարությունները: Հետագայում այդպիսի նշանակություն էին ունեցել Մեսրոպ Մաշտոցի թաղած խաչի մասունքները և Եղիշե քարոզչի նշխարները, որոնք վառ էին պահում հայ ուղղափառ հավատքի կրակը և անխախտ՝ միասնությունը մայր հայրենիքի հոգևոր նվիրապետության հետ:

Այս ամենը վերաբերում է Աղվանից եկեղեցու նախապատմությանը:

Գալով քրիստոնեության տարածման և պետական կրոն ընդունելու ժամանակներին վերաբերող տվյալներին, պետք է ասենք, որ այստեղ ևս, ինչպես մեր միջնադարյան հեղինակների, այնպես էլ հետագայի հետազոտողների համար հիմնական ու անառարկելի աղբյուր է ծառայել «Աղվանից աշխարհի պատմությունը»: Ընդ որում, ոչ ոքի մտքով իսկ չի անցել, որ վերջնականապես Ժ դարում շարահարված այդ «Պատմության» տեղեկությունները առավել վաղ ժամանակների իրողությունների մասին ընդունելի կարող են դառնալ միայն վաղ ժամանակներում ստեղծված աղբյուրներով ստուգվելուց հետո, կամ գոնե համեմատվելով այն աղբյուրների հետ, որոնք վկայակոչվում են Ժ դարի մեր շարահարողի կողմից:

Այսպիսի քննություն ցայսօր չի կատարել ոչ ոք, նույնիսկ հայոց եկեղեցու կոթողային պատմության հեղինակ Մաղաքիա արքեպիսկոպոս Օրմանյանը:

Համոզվելու համար, թե այս անքննադատ վերաբերմունքի պատճառով Աղվանից կաթողիկոսությանը ենթակա նահանգների քրիստոնեացման հանգամանքներն ինչպիսի աղավաղ պատկեր են ստացել, կանգ առնենք միայն մեկ փաստի վրա:

Մովսես Դասխուրյանցու հավաստումով, հետագայի Աղվանից կաթողիկոսության ոլորտում, այսինքն բուն Աղվանքում և հայկական Ուտիք ու Արցախ մարզերում, քրիստոնեությունը հիմնավորապես տարածել է Ուոնայր արքան Աղվանից: Իբր թե երբ

Մեծ Հայքը լուսավորվեց Տրդատ թագավորի ձեռքով, «աժ ի հաւատս և զելս արեգականն»⁷. որք սակաւ ինչ ծանուցեալ էին զծագումն փրկութեան ճշմարիտ արեգականն և կրկնակի ընդ ձեռն Ուոնայրի գերագոյն լուսաւորեցան: Եւ այսք ի միում ժամանակի եղեն հրաշք աստուածուստ... (Ուոնայրը) առնու և զվերստին ծնունդն ի սրբոյն Գրիգորէ Հայոց Լուսաւորչէ, գայ լուսազգեստեալ ի սուրբ Հոգւոյն՝ առաւել լուսաւորէ զԱղուանս, եւ կայ, մնայ որդի մշտնջենական լուսոյն և վախճանէ զմարդկային կեանս: Իսկ զկնի սորին մահուանն խնդրեցաւ յԱղուանից մանուկն Գրիգորիսս ի կաթողիկոսութիւն իւրեանց, զի Ուոնայր արքայն մեր խնդրեաց ի սրբոյն Գրիգորէ նորին ձեռնադրութեամբն լինիլ եպիսկոպոս աշխարհին իւրոյ...»⁸:

Այսպես, ուրեմն. Ուոնայր արքան Աղվանից, Մեծ Հայքի թագավոր Տրդատի հետ միաժամանակ, մկրտվելով Գրիգոր Լուսավորչից, եկավ, վերստին քրիստոնեացրեց Աղվանից աշխարհը կամ Արևելքը: Իսկ նրա մահվանից հետո էլ Արևելքի համար խընդրեցին, որպեսզի կաթողիկոս ձեռնադրվի Լուսավորչի թոռ Գրիգորիսը, քանի որ դեռևս Ուոնայրն էր խնդրել Լուսավորչին՝ անձամբ ձեռնադրելու Արևելից երկրի եպիսկոպոսին:

Կարելի էր մտածել, թե խոսքը վերաբերում է միայն բուն Աղվանքին, քանի որ Ուոնայրն իսկապես թագավորել է այնտեղ: Սակայն հիշատակված է նաև Գրիգորիսը, որ եպիսկոպոսություն է արել Արցախում (Ամարասն էր նրա աթոռանիստը): Հետևապես հեղինակը նկատի ունի հետագայի կաթողիկոսության ոլորտի մեջ առնված ամբողջ տարածքը⁹:

Բայց օրինական հարց է առաջանում. Ժ դարի մեր շարահարողը որտեղի՞ց պիտի քաղած լինի այս տեղեկությունները: Ան-

⁷ «Զելս արեգականն», այսինքն՝ արևելք: Պատմության մեջ «Արևելք» «Արևելից կողմանք», «Արևելից կողմանք Աղուանից» կոչվում են Մեծ Հայքի հյուսիս-արևելյան նահանգներ Ուտիքն ու Արցախը միասին, երբեմն՝ ներառյալ նաև բուն Աղվանքը, հատկապես երբ նկատի է առնվում մարզպանության շրջանը:

⁸ Կաղանկատուացի, էջ 21—22:

⁹ Այս տեղեկություններին մինչև վերջ հավատում էր Մաղաքիա արքեպս. Օրմանյանը (տե՛ս «Ազգապատում», § 71): Նույն վերաբերմունքն ունեն նաև հետագայի ուսումնասիրողները՝ Ս. Տ. Երեմյանը (տե՛ս «Очерки истории СССР, III—IX вв.», М., 1958, էջ 323), Կ. Վ. Տրևերը («Очерки по истории и культуре Кавказской Албании», М.—Л., 1959, էջ 217 և հոդ.) և ք:

կասկած՝ հին աղբյուրների՝ Զատկապետ վերոհիշյալ տեղեկություններն ընդգրկող հատվածից առաջ նա հիշում է իրեն նպատակորամ քերթողահայր Մովսեսին, այսինքն Մովսես Խորենացուն¹⁰: Իսկ Մովսես Խորենացու ճանաչած Ուոնայր թագավորն Աղվանից հետագա ժամանակների գործիչ է, որը ոչ մի առնչություն չի ունեցել քրիստոնեության տարածման հետ և նույնիսկ Հայոց թագավորի բարեկամն էլ չէր: Պարսից արքունիքի հրահրմամբ նա կովի էր եկել Պապ թագավորի դեմ և Զիրավի հայտնի ճակատամարտում (371 կամ 372 թ. զարմանք) պարսկական զորքերի հետ միասին խայտառակ ջարդ կրեց: «Ընդ որս և գնոնայր Աղուանից արքայ, խոցոտեալ ի Մուշեղոյ որդոյ Վասակայ Մամիկոնէի, հանին ի պատերազմէն»¹¹:

371/2 թ. պատերազմի դաշտ դուրս գալու համար թագավոր Ուոնայրը պետք է բավական ջանքեր ու առույգ լիներ: Սակայն եթե նա դարի արշալույսին հավատանապատ եռանդուն գործունեություն էր ծավալել, ապա ավելի քան 70 տարի անց, հավանաբար, գաղամյալ ծերունի է եղել¹²:

Այս անհամաձայնությունը վերացնելու նպատակով Հր. Աճառյանն ընդունում էր, թե Դ դարում Աղվանքի վրա իշխել են Ուոնայր անվամբ երկու թագավորներ. «Ուոնայր Ա... Պարսից Ծապուն թագավորի քեռայրն էր. եկավ Հայաստան, քրիստոնյա դարձավ, մկրտվեց Լուսավորչից և քրիստոնեությունը տարածեց Աղվանքում», և «Ուոնայր Բ... Պարսից հետ միացած ճակատեց Հայոց Պապ (368—374 թթ.) թագավորի դեմ. գերի բռնվեց Մուշեղ Մամիկոնյա-

նից, որ վեհանձնաբար ազատ արձակեց նրան»¹³:

Սակայն Մովսես Դասխուրանցին Աղվանից երկու Ուոնայր թագավոր չգիտի: «Պատմության» բոլոր ձեռագրերում ու տպագիրներում նրա ներկայացրած Աղվանից թագավորների ցանկն ունի միայն մեկ Ուոնայր («Եւ որ ըստ կարգի կացին թագաորք տանս Աղուանից՝ անուանք են այսոցիկ. Վաչագան քաջ, Վաչէ, Ուոնայր, Վաչագան, Միրհաւան, Սատոյ, Ասայ, Եւուաղէն, Վաչէ, ապա Բարեպաշտն Վաչագան»)¹⁴: Այս Ուոնայրին էլ սկզբնաղբյուրները (Փավստոսի ու Խորենացու երկերը) գիտեն միայն վերոհիշյալ ճակատամարտի առնչությամբ:

Դասխուրանցին, հենց սույն այս հիշատակություններից քաղելով Ուոնայր անունը (նա ուրիշ աղբյուր չունի, հակառակ դեպքում անպայման կվկայակոչեր), նրան է վերագրել Աղվանից աշխարհը լուսավորելու ծառայությունը:

Որ այսքանը առ ի չգույն հորինված պատմություն է, ապացուցվում է վերը շարադրված տեղեկությունների մի այլ բնույթի անտրամաբանականությամբ: Այդ տեղեկությունների համաձայն, պետք է որ Ուոնայրի ձեռքով Աղվանքը լուսավորված լիներ, որպեսզի դրանից հետո Գրիգորիսն այնտեղ եպիսկոպոս ձեռնադրվեր: Սակայն, ինչպես հետո կտեսնենք, Գրիգորիսը եպիսկոպոս էր նշանակված Արցախում և այնտեղ իր գործն ավարտելուց հետո քարոզչության գնաց բուն Աղվանք ու այնտեղ էլ նահատակվեց նույն այդ բուն Աղվանքի թագավորի հրամանով¹⁵: Իսկ այդ թագավորի անունը ոչ թե Ուոնայր էր, այլ Սանեսան:

Սակայն այս մասին՝ քիչ հետո:

Մ. Դասխուրանցին, Ուոնայրի շուրջ հորինելով այս պատմությունը, չի նկատել նրա մանրամասների մեջ եղած նաև մի այլ հակասությունը. Գրիգորիսը եպիսկոպոս է նշանակվել Դ դարի սկզբին, իբր թե Ուոնայրի մահվանից հետո. «Ուոնայր արքայ Աղուանից... վախճանէ գմարդկային կեանս: Իսկ զկնի սորին մահուանն խնդրեցաւ յԱղուանից մանուկն Գրիգորիս ի կաթողիկոսութիւն իրեանց...»¹⁶:

Գրիգորիսի Ամարասում նշանակվելը,

¹⁰ Կաղանկատուացի, էջ 19:

¹¹ Մովսես Խորենացի, Պատմություն Հայոց, Տրփ-դիս, 1913, էջ 304: Նույնը նաև՝ Փաւստոս Բիւզանդ, Դրվագ Ե, գլ. Դ:

Մանանդյանի կարծիքով ճակատամարտը տեղի է ունեցել ոչ թե Զիրավի դաշտում, «այլ Բագրևանդ գավառի Բագավան ավանի մոտերքում՝ Նպատ լեռան հյուսիսակողմում, ինչպես այդ որոշակի վկայում են Ամմիանոսը և Փավստոսը» (Հ. Մանանդյան, Զննական տեսություն հայ ժողովրդի պատմության, հ. Բ, մասն Ա, Ե, 1957, էջ 205):

¹² Մ. արքեպս. Օրմանյանը («Ազգապատում», § 71), չնկատելով այս շփոթը, գրել է, թե «Աղվանից Ուոնայրը, կերևի թե գերի ինկավ, որ Հայոց մայրաքաղաքի մեջ կը գտնվի» (Պապի դեմ կովելուց հետո.—Բ Ու.), և իր երկիրը դառնալով «ստաւել լուսաորէ գԱղուանս» (կովից 70 տարի առաջ.—Բ. Ու.):

¹³ Հր. Աճառյան, Հայոց անձնանունների բառարան, հ. Դ, Ե., 1948, էջ 204:

¹⁴ «Պատմություն Աղուանից աշխարհի», գիրք Ա, գլ. ԺԵ:

¹⁵ Մ. Խորենացի, էջ 259: Փ. Բյուզանդ, դպր. Գ, գլ. Զ:

¹⁶ Կաղանկատուացի, էջ 21—22:

ըստ Մաղաթիա արքեպս. Օրմանյանի հաշվումների, եղել է ամենաուշը 320-ական թվականներին¹⁷: Սակայն, վերոհիշյալ աղբյուրների համաձայն, Ուռնայրը կենդանի էր դեռևս 370-ականներին և ճակատամարտ էր տալիս Հայոց զորքերի դեմ:

Այստեղ մենք անտես ենք առնում այն հանգամանքը, որ եթե Ուռնայրը նույնիսկ առնչություն ունեցած էլ լիներ բուն Աղվանքում քրիստոնեություն տարածելու գործին, ապա նա այդպիսի դեր չէր կարող խաղալ Ուտիքում ու Արցախում, այսինքն մարգարանական Աղվանքի աջափնյակում, քանի որ Դ դարում այդ երկրամասը Մեծ Հայքի երկրամասի մեջ էր գտնվում և նրա հետ էլ կարող էր ու պետք է ընդունել նոր հավատը:

Բարեբախտաբար Հայաստանում քրիստոնեության տարածման հանգամանքները ներկայացնող մեր ամենաարժանահավատ աղբյուրը՝ Ագաթանգեղոսի Պատմությունը¹⁸, հավաստում է հարցի այս կողմը պարզող մի շատ կարևոր մանրամասն:

Արշակունյաց միասնական թագավորության ժամանակներն էին, երկրի բոլոր տասնհինգ նահանգները՝ մեկ միապետի հովանու ներքո, միական ու համերաշխ: Գրիգոր Լուսավորիչը Կեսարիայում պետք է Հայոց քահանայապետ ձեռնադրվեր, և այդ սրբազան արարողության կատարելության համար Տրդատ թագավորի հրամա-

նով հավաքում են «զգլխաորս նախարարացն և զկուսակալս աշխարհացն», որոնց շարքում են՝ «առաջին՝ իշխանն Անգեղ տան, երկրորդ՝ իշխանն Աղձնեաց, որ է բդեաշխն մեծ... ութերորդ՝ իշխանն Գուգարացոց աշխարհին... մետասաներորդ՝ իշխանն Սիւնեաց աշխարհին, երկուտասաներորդ՝ իշխանն Ծաղեհից աշխարհին, երեքտասաներորդ՝ իշխանն Ուտիացոց աշխարհին...»¹⁹:

Մենք այստեղ նշեցինք պատմիչի ցանկի այն անունները, որոնք կարևոր են քննվող հարցի համար. Գուգարացոց, Սյունյաց, Ծաղեհից (որ է՝ Արցախի)²⁰ և Ուտիացոց աշխարհների կուսակալ-նախարարները: Եվ ահա նրանք Մեծ Հայքի մնացած նահանգների տիրակալների հետ են, Արշակունի թագավորի հրամանով հրավիրվել են մեկտեղ:

Ապա պատմիչը շարունակում է. «Այս իշխանք են ընտիրք կուսակալք, կողմնակալք, հազարաւորք, բիրաւորք ի մէջ Հայաստան աշխարհի տանն Թորգոմայ, զորս գումարեաց թագաւորն Տրդատ և առաքեաց զնոսա ի կողմնս Կապուտկացոց (կարդա՛ Կապադովկիացոց.—Բ. Ու.) ի քաղաքն Կեսարացոց, զոր ըստ հայերէն լեզուին Մաժաք կոչեն. զի տարեալ զԳրիգորն՝ քահանայապետ կացուցեն իրեանց աշխարհին...»²¹:

Կատարվում է թագավորի հրամանը: Գրիգորը ձեռնադրվում է Հայոց քահանայապետ և «մեծաւ պատուով և թղթով և ժողովով զսուրբն Գրիգորիոս անդուստ յողարկեցին իշխանօքն հանդերձ»²²: Հայաստան մտնելով, նոր հավատի առաջնորդը, «նախարարակոյտ զօրուն հանդերձ», իր երկար ճանապարհին ավերել է տալիս հեթանոսական կրոնի մեհյաններն ու բազիլիկները, նրանց տեղերում հիմնում նոր հավատի սրբարաններ «եւ կացուցանէր քահանայս ի տեղիս-տեղիս»²³:

(Շարունակելի)

¹⁷ Օրմանյան, § 98:

¹⁸ Հետազոտողների մանրակրկիտ քննությամբ վաղուց պարզված է, որ Ագաթանգեղոսի անունով մեզ հասած Պատմությունը, չնայած Ե դ. կեսին ավարտուն, վերջնական տեսքի բերված լինելուն, իր հիմքում ունեցել է Գրիգոր Լուսավորչի ու Տրդատի զորքերին նվիրված մի ստեղծագործություն, որ եկել էր Դ դարից, դեպքերի անմիջական օրերից, ու գրված է եղել նույն այդ դեպքերի ժամանակակից ձեռքով: Այս ստեղծագործության հավաստի տեղեկությունները, ի՛նչ խոսք, անխաթար պահպանվել են Ե դարի խմբագրության մեջ, որով և վերջինս ունի անառարկելի սկզբնաղբյուրի նշանակություն (Այս առթիվ հանգամանորեն տե՛ս Մ. Աբեղյան, Հայոց հին գրականության պատմություն, գիրք առաջին, Ե., 1944, էջ 157—162: Հենրիկոս Գելգեր, Փավստոս Բյուզանդ կամ հայկական եկեղեցվո սկզբնավորություն, Վենետիկ, 1896, էջ 16). «...իրավամբ Ագաթանգեղոսի այս մասն («Հայաստանի դարձին և այնուհետև պատահած դեպքերու մանրամասն տեղեկությունք») կրնա իբր բացարձակ արժանահավատ աղբյուր համարվիլ»:

¹⁹ Ագաթանգեղոս, էջ 403—404:

²⁰ Արցախի նախարարությունը, Ծաղե-Ծոդե-Սոդե իշխանանիստ ավանի անունից, կոչվում էր նաև Ծաղեհից իշխանություն կամ նախարարություն (տե՛ս Н. Адонц, Армения в эпоху Юстиниана, СП, 1908, стр. 293—294.

²¹ Ագաթանգեղոս, էջ 404:

²² Անդ, էջ 409:

²³ Անդ, էջ 413: